

"Mi mama a haya e cas aki for di su mama, dus mi abuela, y despues ami a keda cu ne", Alice ta cuminsa conta di su cas. Tabata net un siman pasa ora cu mi a pasa ariba un atardi pa puntra Alice si e ta desea di participa den nos edicion di Arte & Cultura di Aruba, y mi a sinta combersa cu ne den un di e skinanan mas agradabel di su hogar, su biblioteca / oficina na unda e ta sinta traha tur dia. "Esaki tabata e cas den cual mi abuela y abuelo a biba, y mi mama cu su ruman muher a dicidi cu nan lo tira un coin pa mira ken lo keda cu e cas, y mi mama a gane", Alice a studia Nederlandse taal en letterkunde, anto despues e a bai haci bibliotheek en documentatie academie na Amsterdam, Hulanda, y despues e a biba y traha pa 6 aña na Korsow, na unda e a studia Staatsinrichting tambe. "Despues mi a haya un trabao na Aruba como director di Bibliotheek, anto un paar di aña prome cu mi a regresa Aruba, mi welo y mi wela (shon Jeffy y Ali de Veer) nan bai biba den un cas banda di mi mama, paso esaki tabata mucho grandi pa nan dos so, anto nan a huur e cas aki, ora cu eya a bin bek, mi tabatin e suerte di por a haya e cas aki, anto for di e dia ey mi ta akinan, cu ta mas cu 25 aña", Alice ta corda cu su abuelonan tabata personanan masha stima pa tur nan nietonan, anto tur dia e tabata bin cuminda su abuela y su abuelo. Su abuela tabata tin un hofi di rosa, cu a inspira su prima Belinda de Veer pa pinta un serie di cuadro cu yama "Hofi di Rosa", actualmente tin uno di e serie colga den sala di e cas.

"Mi amor pa arte tey for di tempo cu mi ta un mucha, ami mes no tabata por pinta bon, pero semper mi a gusta arte for di tempo mi tabata chikito mi tabata cambia e decoracion di mi camber constantemente", Alice su amor pa arte y decoracion ta asina grandi, cu si por ehempel mester bai for di su cas pa motibo di urgencia, e prome cos cu e lo haci ta saca su paspoort, su joyanan biew cu e haya for di su antepasadonan, su abuelanan y di su mama, algun cuadro cu e ta masha mara na nan y tambe algun buki. "Anto mi jioe Jody ta bisa cu elo haci mescos", Jody mescos cu su mama, ta adora su famianan di tur dos banda, tanto Van Romondt como De Veer.

Tempo di su estudio, na Hulanda e tabata bay hopi exposicion, te hasta





e a yega di mira un exposicion di Salvador Dali na Rotterdam, e a mira Dali personalmente sin realisa con grandi Dali tabata e tempo ey y te awor! Na Korsow e a inverti su prome salario den un cuadro di Ellis Juliana, di dos señora di Korsow sinta den forma tipico di haci redo. "Mi ta stima arte cu un pasion grandi, mescos cu mi amor pa buki, pasobra ta un sensacion dushi pa biba mei mei di arte y literatura, y mi ta haya mi mes un poco cu obligacion moral pa cumpura y sostene nos arte, mi ta purba asisti na hopi teatro, baile y exposicion, dus creacionnan artistico, cosnan fuera di ambiente di tur dia". E mueblesnan den Alice su cas ta un mescla, hopi di e mueblesnan ta pisanan cu e a hereda for di su abuelonan. "E lessenaar cu bo ta mira den e skina eynan", e ta bisa señalando un precioso secretaire den e skina di su sala. "mi a yega di skirbi mi nomber anto peghe bow di dje, pasobra mi tabata fasina cu e mueble ey, e piano ta un regalo cu mi otro abuela a haci na mi yiu Jody, tempo e tabatin 6 aña". Alice ta sigui mostranos e diferente mueblesnan cu e a hereda for di su famianan, algun cu ta data for di tempo cu su tata a nace na Sint Maarten. Tur cos den e cas di Alice ta original, e floor di parket, e tegelman di Madeira, pero tempo cu Alice a tuma e cas bek for di esunnan cu tabata huur e, e mester a constata cu nan a laga pone tapij ariba e floor di palo. "Ariba mi rudia mi a sinta frega full e cas cu tandenborstel pa kita e lijn cu a keda pega despues cu mi a ranca e tapij", e ta conta. "Mi estilo ta Caribeño, Colonial, cosnan nobo (moderno) combina cu cosnan di antes, e palo Mahogany ta mi bida, e shuttersnan di palo estilo di antes, un cas pinta blanco cu floor di palo, I LOVE THAT!!"

E obranan di Alice su coleccion ta varia di artistanan manera Gioliana Henriquez, Stan Kuiperi, Belinda de Veer, Osaira Muyale, Alida Martinez, Elvis Tromp, Elvis Lopez, Glenda Heyliger, Gilbert Senchi, Maritza Erasmus, Juni de Windt, Padu, Renwick Heronimo, Gustave Nouel, Eefje van der Straten, Ciro Abath, Mo Mohammed, Winston Davis y hopi mas. "Mi yiu tambe ta echt gusta, mi ta kere ta algo cu ta di famia, ami ta gusta lesa, y mi yiu Jody tambe ta gusta lesa, mi mayornan tabata gusta lesa, anto hopi Jody ta gusta toca piano tambe, ami no sa toca, pero mi ta gusta pone musica den cas, mi gusta musica".

Alice su lugarnan favorito den su cas ta depende di e ora di dia, ora di sunset e ta gusta sinta den cura, pa e por mira lama, mainta e ta gusta sinta den su patio tambe, ora cu ta merdia e ta gusta sinta den su veranda, y anochi e ta gusta pone musica den su sala, sera e portanan, sinta den un stoel di zoya y lesa buki, den su biblioteca chikito e ta sinti su mes feliz, organisando, coordinando cualke proyecto di "su" fundacionnan cu e ta dirihí, skibiendo, haciendo research y preparando ya su di 5 obra, of compilation. "Cu arte bo no por perde nunca, bo ta yuda bo mes spiritualmente pabo crece den e mundo grandi cu tin y e ta un inversion, paso semper e bator ta sigui subi, e mundo di arte ta un mundo sin limite y e obranan ta "one of a kind". Alice ta bisa nos cu e no ta cumpura obranan cu ta wordo ripiti constantemente, e ta cumpura ora cu e obranan ta unico. Un otro exigencia cu Alice tin ta cu e no ta gusta cumpura paisahenan masha, e no ta gusta potret tampoco, mas bien cuadronan abstracto, cuadronan cu ambiente, kisas cu temanan especifico manera cu e tin 2 inspira riba human rights.

Anke e por ta hopi druk mes, Alice ta gusta pasa tempo na su cas, tambe e ta purba di bai diferente lugar na unda e por snuffel rond y cumpura articulonnan pa su cas, na Aruba e ta gusta especialmente lugarnan di mata, y den exterior e ta gusta bai mercado y tendanan di curiosa. "Esaki ta echt un mundo di fantasia", nos ta bise. "Pami e no ta un fantasia..... esaki ta mi realidad".



Alice